

Муҳаммад
Юсуф

ИЛТИЖО



ШЕЪРЛАР

Тошкент
Ўзбекистон ЛКСМ Марказий Комитети
«Еш гвардия» нашриёти
1989

84437.
10-91

1990	ГБ УзССР 11268
------	-------------------

Ю $\frac{4702570200-40}{356(04)-89}$ 86-88

ISBN 5 633 - 00086 - 0

© Издательство „Ёш гвардия“, 1988



БИР КУНИ

*Бир кун
Бир алвон замон келади,
Замин узра омон-омон бўлади.
Ун йилми,
Юз йилми ўтиб орадан,
Урушлар,
Низолар кетиб орадан,
Тўплар —
Адирларда буғдой ўради
Танклар —
Далаларда пахта теради.
Миллатлар,
Элатлар,
Ок тан, қора тан
Ҳаммаси
Хазрати инсон бўлади.
Олам гулистон бўлади.
Бир кун...
— Шоирлар-чи, бобо,
Шоирлар нима бўлади?
— Уларнинг шодликдан
юраклари ёрилиб ўлади!*

ҚУШИҒИМСАН ВАТАНИМ

УРУШ БУЛМАСИН

Дунё-дунё бўлиб яралди қачон,
Ҳаёт оҳанглари таралди қачон,
Зулмат ёруғликни кўролди қачон...
Нима бўлса бўлсин, уруш бўлмасин.

Баҳор ислаганин билмасам майли,
Қирларда лолалар термасам майли.
Майли, хандон кулиб юрмасам майли,
Нима бўлса бўлсин, уруш бўлмасин.

Балки умрим узун, балки қисқадир,
Майли, билмай ҳузур, ҳаловат надир.
Майли, меҳнат қилсам топмасам қадр,
Нима бўлса бўлсин, уруш бўлмасин.

Наҳот ғаним билса одам одамни,
Куйдириб кул қилса ёруғ оламни?
Мен кимга ишондим ёлғиз боламни...
Нима бўлса бўлсин, уруш бўлмасин.

БРИГАДИР

Ленин орденли бригадир
А. Аҳмедов ҳаётидан лавҳа

Уни танишади қишлоқда,
Ҳатто тилга олмай туриб отини.
Ўндагина қилиб айтсам агар мен:
Кунда кир ювади хотини...

Қўҳликкина хотини,
Шўрликкина хотини.
Кунда кир ювар-да, тушуна олмас
Эри бригадирми,
Тракторчими?..

Лекин гап бундамас,
Гап шундаки,
Кимки астойдил
Ерга меҳр қўйса,
Қайтади бир кун,
Қора терни сидириб туриб,
Чўпиллатиб ўпиб пешонасидан,
Эли унга раҳмат айтади бир кун.
Мана қуллуқ қилар
Бу кун ал,
Марҳаматдан тортиб Асака,
Оёққа қолқийди каттаю-кичик
Уни кўриб: — Бригадир ака!..
Эҳе, бу кунларга еткунча
Озмунча машаққат чекмади.
Юрагини анов инжиқ ерларга,
Тилагини аноя инжиқ ерларга
Ҳеча қайта экмади.

Гап буида ҳам эмас,
Гап шундаки,
Кимки астойдил
Ерга меҳр қўйса,
Қайтади бир кун.
Қора терни сидириб туриб,
Чўпиллатиб ўпиб пешонасидан,
Эли унга раҳмат айтади бир кун.

Аммо,
Қаердасиз, ўртоқ мухбирлар.
Нималарни кўзлаб юрибсиз?
Яна қаерларда,
Яна қайси бир
Пуфак қаҳрамонни
Излаб юрибсиз?!
Истардимки, бу кун
Бор ишни ташлаб
Бир кишини йўқлаб келсаларингиз.
Десаларингиз:
Абдиҳошим Аҳмедов,
Мунча озгинсиз,
Мунча бўлиқ тўзаларингиз..

ЕҚУБ МЕРГАН

Еқуб чолга «Запорожец» беришмади,
Аризалар ёзиб борса, кўришмади.
Кўргач эса кўрмагандек елка қисиб,
Кўнишмади...

Еқуб чолнинг кўкси тўла орден эди,
Қайга борса ўрни тайин тўрдан эди,
Нима дейсиз — икки уруш кўрган эди,
Берлинда суратга тушган мерган эди.

Биттагина оёғи ҳам толдан эди,
Биттасини дўхтир кесиб олган эди.
Нима дейсиз — шундай бўлиб қолган эди,
Гурс-гурс қилиб юришлари ёлгон эди.

Бошлиқ чолга «Запорожец» бермади,
Аризалар ёзиб борса кўрмади.
Кўргач эса кўрмагандек елка қисиб,
Кўнмади...

Еқуб чолнинг райсобресдан кўнгли қолди,
Еқуб чолнинг бошлиқ-бездан кўнгли қолди,
Мендан, сиздан — ҳаммамиздан кўнгли қолди,
Машинасин бошқа олғир кимса олди.

Энди ул зот ялло қилиб юраверар,
Инвалиднинг машинасин сураверар,
Уни кўрсам чол эсимга келаверар,
Филдираги юрагимни элаверар...
Еқуб чолга беришмаган «Запорож»нинг!

* * *

Сизни ҳеч ким танимайди Андижонда,
Сизни ҳамма танийди Ўзбекистонда.
Сиздек бўлсак қанийди Ўзбекистонда..
Марҳаматлик менинг деҳқон сингилларим.

Мен бир шаҳар сулув билан кулиб юрдим,
Кулиб юрдим лекин кадрим билиб юрдим.
Соғинганда Сиз ёққа термулиб юрдим..
Марҳаматлик менинг деҳқон сингилларим.

Садоқатдан сўйлади гоҳ шоирчалар,
Куйлайверди, куйлади оҳ, шоирчалар..
Излаганинг ана-ку, боқ шоирчалар —
Марҳаматлик менинг деҳқон сингилларим.

Адолат бу шийпонларга қайрилган йўл,
Саодат бу хирмонларга қорилган йўл.
Садоқат бу кузақда тарс ёрилган қўл —
Марҳаматлик менинг деҳқон сингилларим.

О,юртимнинг қадоққўл Зулайҳолари,
Барчинлари, Турсунойи, Зеболари.
Қадим Ўзбекмомо мерос иболари —
Марҳаматлик менинг деҳқон сингилларим.

Оқ кийинган дунё унинг эъзозида,
Халоват йўқ на баҳори, на ёзида.
Ҳиссаси бор Гагариннинг парвозида —
Марҳаматлик менинг деҳқон сингилларим!..

Сизни ҳатто танимайди андижонлик,
Сизни ҳамма танийди ўзбекистонлик.
Сиздек бўлса қанийди ўзбекистонлик —
Марҳаматлик менинг деҳқон сингилларим.

* * *

Бу эшик жимгина очилавермас,
Бармогингни таниб йиғлар бу эшик.
Занг илгак сурилса чўғдек бир савод
Юракка санчилар кўкракни тешиб:
Қаерда юрибсан, эгамнинг ўғли?..

Отангинг томида лолақизғалдоқ,
Отангинг уйида кўринмас бир жон.
Ана, кўмилмаган анор шоҳлари
Синар ва хўрсинар умр — ўқилон:
Қаерда юрибсан, эгамнинг ўғли?..

Ким у воҳ, энгашиб лойқа сув ичди
Ва уватга чўкди кўксини ушлаб,
Кетмони чирқирар кесакни муштлаб:
Қаерда юрибсан, эгамнинг ўғли?..

Ким у воҳ, қўлида тешиккулчалар:
Невараларимга уйим Ватандир,
Ҳовлимни тўлдириб юришгай улар...
Жонимни чўқийди кул босган тандир:
Қаерда юрибсан, эгамнинг ўғли?..

Бу ҳовли жимгина туравермайди,
Утларга кўмилиб йиғлар бу ҳовли:
Қаерда юрибсан, эгамнинг ўғли?
Қаерда юрибсан, эгамнинг ўғли?..

БОБОМ БИЛАН СУҲБАТ

Дунё билан ишим йўқ эди,
Сийёсатга ҳушим йўқ эди.
Нима бўлар буёғи энди...
Ким билади, болам.

Уканг кунда ўқир газета,
Атом дейди, дейди ракета.
Борманми ё йўкманми эрта...
Ким билади, болам.

Хасис қўшним йиғиб тўймайди,
Гийбатчиси ёзиб қўймайди.
Отса отиб, сўйса сўймайди...
Ким билади, болам.

Келганингдан хурсандман лекин,
Бу йил сирмас полизга экин.
Олиб кетгин, тўйгунча егин...
Ким билади, болам.

Менинг ўйим — тинч бўлса олам,
Кетмон чопсам, яшнаса далам.
Кўролмаслар бўлса шуни ҳам,
Ким билади, болам...

Урушқоқлар асабга тегса,
Деҳқон агар ғазабга келса,
Кейин нима бўлишин эса —
Ким билмайди, болам!

• • •

«Оламда нима гап» бўляпти,
Хира ёғду сочар телевизор.
Айвонда шолчада бир бола
Ултирар чўнқайиб... кўйлаклари кир.

Ховлида ҳар кунги юмушлар,
Ховлида ёвғир ер муштлар.
Момоси дарғазаб, беарқон
Бузоқчани тутолмай бу он.

Бузоқни қарғайди ҳарсиллаб.
Қозиқни ўқталар: «Бўйнинг узилгур!»
Айвончада эса бир бола
Ултирар чўнқайиб иштони ҳам кир.

Оламда нима гап бўляпти?..

* * *

Тушимга киради Қодирий бобом,
Бемадор, бемажол, беҳол, беором.

Эгнига эски бир тўн кийиб олган,
(Шинелдир балки у, кимдандир қолган).

Шинелнинг енгида похол ҳам бордай,
Бобомнинг юзлари оқарган қордай.

Осмондек, осмонда Чўлпондек унинг
Чарақлаб тургувчи кўзи тўла мунг...

Тушимга киради Қодирий бобом,
Тур энди, бунча кўп ухладинг, болам.

Боқ, бу чоғ айланиб жўхоризоринг,
Уроғин қайрайди онаизоринг.

У ўриб бўлгунча ризқу зарингни,
Уйнатиб тур чиқиб, укаларингни.

Ва менинг саломим етказ аларга —
Бобосин соғинган мусичаларга..

Тушимга киради Абдулла бобом,
Оҳ, олтин бобом-а, воҳ, тилла бобом!

Ёлғон ёмон дерлар,
Хушомад ёмон.
Ёмонликнинг бари ёмондир, бироқ
Менимча дунёда энг катта гуноҳ —
Соғинмай яшамоқ...

Тилга келганини айтаверамиз,
Суриштирмай ростдир-ёлғондир, бироқ.
Менимча дунёда энг катта гуноҳ —
Қари қиз ҳақида гийбат тўқимоқ.

Ким бу шеърим ўқиб ошкора кулса,
Бечоралар нчра бечора билса...
Менимча дунёда энг огир гуноҳ —
Ҳиринглаб шеър ўқимоқ!

ТУҒИЛГАН КУНДА

Жилмаяр кимнингдир дўрдоқ лаблари,
Зада кўнгил ўзи уқиб олади.
Сенинг кўйлагингнинг енги кўп узун,
Менинг эса тилим узун, галати.

Қандилга термулиб мастона нигоҳ,
Зимдан биз томонга разм солади.
Сенинг қўлингда ҳеч турмайди пичоқ,
Такаллуфни билмас мен ҳам, галати.

Боқадм тозидай гоҳ қулоғи динг,
Кўзига ншонмай қотиб қолади.
Сен қандай ўқчимай майни ҳўпладинг,
Тутилмай шеър айтдим мен ҳам, галати..

Имлайсан — кетайлик. У яна сергак,
Столга энгашиб гулни ҳидлайди.
Барини билар у дунёда, фақат
Онаси туғилган кунни билмайди.

ҒУРУР

Ҳозир менга кулиб қарайсан,
Беғамгина бош иргайсан жим.
Ва йўлингга кетаверасан,
Худди сенга йўқдек керагим..

Малоя ўйнар, йўқ, савол ўйнар.
Дугонангни кўзларида: — Ким?
Бир силкилиб қўяди кафтинг,
Худди сенга йўқдек керагим.

Қарамайман ортингдан мен ҳам,
Тезроқ бундан кетмоқ тилагим.
Ва шўнғийман троллейбусга,
Худди менга йўқдек керагинг..

Сени гоҳи йиғлагинг келар,
Мени эса гоҳида ичгим.
Шундай, шундай катта шаҳарда,
Бизга ёрдам беролмас ҳеч ким..

МЕТИН ИРОДАЛАР

Куз она тупроққа дардин тўкар жим,
Сарғайган дарахтлар баргин тўкар жим.
Қаранг, ҳайдаб борар оплоқ даладан,
Олчоқларни фидойи юртим!

Ҳайдаб бөрар беҳад буғдойзорлардан,
Ҳайдар саройлардан, креслолардан.
Уттиз йилдан бери биричи марта
Пиёда кетмоқда бу йўгон гардан.

Кўнгилчанлих қилманг зинҳор ва зинҳор,
Кўпроқ юриш керак, буларга кўпроқ.
Димоғи олдида қон қусар осмон,
Товоғи заҳмида чирқиллар тупроқ.

Темир парчалари,
Чўян парчалари —
Кўз ёшдан занглаган металлوم бўлар.
Агарда яраса домна печларида
Юзтасидан битта бўйинтуруқ қуйилар...


Эй, сен, такаббур зот, нега имиллайсан?
Буни тасодифмас — ҳақиқат дерлар.
Бу йўлнинг сўнгида сени кўр қилгай,
Деҳқоннинг юзидан ёғилган терлар.

Манов манзарага боқ Ўзбекистон —
Қиқирлаб кулмоқда қадоққўл синглим.
У — менинг далага сочган саволим.
У — менинг пахтага беланган кўнглим.

Офтобнинг тафтидан олам мунаввар,
Бу бир тантанаси Ленин ғоясин.

Метин иродалар, Сизларни бу кун
Буюк Икқилобнинг руҳи қўлласин!..

Куз она тупроққа борин тўкар жим,
Сарғайган баргларин зорин тўкар жим.
Кўринг, ҳайдаб борар виждон даштига —
Олчоқларни фидойи халқим...



• • •

Мен кузни соғиндим.
Куз саволлари —
Елгончи турналар қайтасиз қачон?
Той кишнар шамолда ўйнаб ёллари
Болалик. Болалик. Айтишга осон.

Бир қизни соғиндим..
Сепкилюз қизни,
Онажон, дардимга йўқ энди шифо.
Келсам ҳам, кетсам ҳам куйдирдим Сизни,
Кўксимда шул армон, мен мажнуннамо.

Тушларимда бўлса ўзга одамлар,
Тушларимда бўлса... бошқа бир савол.
Бир қизни соғиндим, сепкилюз қизни
Меисендан қўрқмасман, тақдур-азал.

ШУКУР БУРҲОН

Шукур Бурҳонни ҳам кузатиб қўйдик,
Кетди қон юраги устида қўли.
Ортдан эргашиб биз мўмин қўйдек
Бориб, қўйиб келдик ўлкамиз тўлиб.
Бордик дўстлари ҳам,
Душманлари ҳам,
Қабрин устида ҳам сўзладик ёлғон:
Санъат фидолари,
Мен сизга айтсам,
Ундай Шукур Бурҳон,
Бундай Шукур Бурҳон...

Тиригида ҳеч ким айтмаган гаплар,
Ҳали совумаган тупроғига ёғди.
Йиғлади умрида йиғламаган арбоблар,
Кўздан ёшлари сел бўлиб оқди.

Ялангтўш бобо жим кулиб ётарди,
Шунча дўст борлигин ҳеч билмаганди.
Ёспирай, тасаввур ҳам қилмаганди,
Чунки уч кун олдин почтадан олғон,
Меҳнат дафтарчасин қучоғлаб ҳайрон
Хотини олдида шундай йиғлаганди!

Ухраб йиғлаганди,
Ҳўнграб йиғлаганди,
Кўзига тор бўлиб ёруғ жаҳони.
Эркак боши бундай эгилмаганди,

Балки, узилгандир ўшанда жони...
У балки мендан ҳам яшарди кўпроқ,
У балки сендан ҳам яшарди кўпроқ,
Эй, қўнғир тупроқ,
Эй, муқаддас тупроқ,
Сен Шукур бобога болиш бўл юмшоқ!

МАРҲАМАТ

Бугун танбеҳ бермади биров,
Бу жой шаҳар, андайма, иним,
Утиб кетди анмо бу кун ҳам,
Марҳаматсиз тагин бир куним.

Мен шаҳарга ўрганиб қолдим,
Шаҳар менга — йиғирма қават.
Изтиробим ичимга ютиб
Боғлар кездим, ёзолимадим хат.

Унда бир қиз йўлимга илҳақ,
Пахта терди, ўт юлди маънос.
Турна келар кун ўтди — баҳор,
Турна қайтар кунлар ўтар — муз.

Унинг сочи узундан-узун,
Унинг сочи топонга етган.
Лекин гулга ўхшамас юзи,
Қўллари ҳам ёрилиб четган.

Юрак ёнар уни ўйласам,
Буёғи ҳеч шеърга сирмайди.
Кузда қотиб ухлар Марҳамат,
Тунда кутган қанинг чиқмайди.

МАТЕМАТИКАНИ ЁМОН КЎРАМАН

Баҳор адирларда лола тераман,
Одамлар ҳақида ўйлар сураман.
Ҳарбийда кўрганим зирҳли машиналар,
Снарядлардан гишт ясаб,
Осмонўлар ўйлар қураман,
Математикани ёмон кўраман.

Орзуларим қайсар қаноатларим,
Осмонларда учиб юраман.
Синглим — ойни ўлиб, укаларим —
Юлдузларни қучиб юраман,
Математикани ёмон кўраман.

Атомлар-математика.
Водородлар — математика.
Қирувчи самолётлар,
Крематорийлар — математика!
Математикани ёмон кўраман.

Сен эса ширии бир дилдсан.
Сен яхши ниятсан.
Шеъриниятсан...

УЧ ОҒАЙНИ БОТИРЛАР

Марҳаматлик Офтоб момо
урушда уч ўғлидан жудо бўл-
ган. Қўнглим сезади, ҳеч бўл-
маса биттаси тирик деб умид
қилиб яшайди...

Уч оғайни ботирлар,
Европада ётурлар..
Офтоб ўғлин кўтариб
Юрмаган баҳодирлар.

Сатторқули сардори,
Сотволдиси шунқори,
Собири беозори..
Офтоб билмас қайларда
Уч ўғлининг мозори.

Уларни гилаб-тилаб
Олган эди Офтоби.
Қиргин жангга кузатиб
Қолган эди Офтоби.
Бир қўйнига учта нон
Солган эди Офтоби.

О, уч ўғил азоби,
О, уч ўғил азоби!
Уч оғайни ботирлар,
Билмам, қайда ётурлар.
Офтоб ўғлин кўтариб
Юрмаган баҳодирлар..
Момо, уйингда ғам бор.
Жудолик бор, снтам бор.
Соқов билар, гул билар,
Ёғоч оёқ, қўл билар,

Емғир билар, дўл билар,
Юрт билади, эл билар,
Эл билмаса
 кел,
 билар
Виждон — олийҳакам бор!

Уч оғайни акам бор.
Енг ичида пичоқлар,
Йўлин тўсса олчоқлар —
Ғажиб ташлашга тайёр.

Уч оғайни акам бор:
Бирин оти — Жасорат,
Бирин оти — Шижоат,
Бирин оти — Матонат...

Шеърим —
 Шу акам учта,
 Акам бўлиб урушда —
 Қонга бўялган ерим.
Бир томчиси — Адолат.
Бир томчиси — Садоқат.
Бир томчиси — Саодат.
Қолганлари — ривоят...

Уч оғайни ботирлар
Қайтиб келаётирлар.
Офтоб момо, уйингни
Тўлдирди баҳодирлар!

- Қайда эдинг, Сардорим?
- Урушда эдим, Она.
- Қайда эдинг, Шунқорим?
- Урушда эдим, Она.

- Сен-чи? Сен, беозорим?
- Урушда эдим, Она..

Офтоб момо турар лол,
Турар тирик сукутлар —
Йигирмага кирмасдан,
Жангга кетган йигитлар.

Вой, менинг қиёқ жоним,
Вой, менинг бурган жоним.
Юлдуз учса кўкларга,
Термулиб юрган жоним.
Бўғчадаги майизим,
Токчадаги хатларим.
Қизлар ўтса кўчадан,
Қирмаган ниятларим!..
Офтоб момо турар лол,
Туш экан хаёллари.
Остонадан ўтмасдан
Ортга қайтар боллари.

- Қайга кетдинг, Сардорим?
- Урушга-да, Онажон.
- Қайга кетдинг, Шунқорим?
- Урушга-да, Онажон.
- Сен-чи? Сен, беозорим?
- Урушга-да... Онажон.

Уч оғайни ботирлар,
Ғарбга кетаётирлар.
Офтоб ўғлини кўтариб,
!Ормаган баҳодирлар...

ҚИЗИЛ ИЗТОПАРЛАР

Пионер болалар ҳар йил
кузда Офтоб момонинг томи-
ни суваб беришади. Қизил
Изтопарлар... Улар момонинг
ҳеч бўлмаса битта ўғли тирик
қолган деб умид қилиб ду-
шонинг ҳамма бурчагига хат
устига хат йўллашади..

Қизил изтопарлар —
Галстукли чопарлар.
Мана Сизга
Сўнги хабарлар...

Оддий аскар —
Сотволди Сафаров...
Оддий аскар —
Собиржон Сафаров...
Пулемётчи —
Сатторқул Сафаров...
Бу қандай гап ахир?
Қачон тугар,
Бу узун саф ахир?
Қанча ёзай яна
Қўлларим кавариб?!
Волга гулчамбарлар
Остида оқар.
Зиёратгоҳ бўлди
Бресть қалъаси.
Военком қирқ йиллик
Орденни тақар,
Қаердасан,
Офтоб
кампир
боласи?!.

Ким мамот жангида
Тик турган бўлса,
Кўзларга тўтиё
Сочин толаси.
Ленинграддамисан,
Сталинграддамисан —
Қаердасан,
Офтоб
кампир
боласи?!

Қизил изтопарлар,
Уқир хабарлар:
Тунда шаҳар
Душман қўлида эди.
Тонгда уни
Бизникилар олди...
Одий аскар
Сафаровлар
Бедарак йўқолди...

Шеърим —

Сафаровсан бугундан бошлаб,
Ва ўзини дзотга ташлаб,
Қизил қонга бўялган ерим.
Ундан томган барча
Сўзлар меники,
Согиниб хат кутган
Кўзлар меники.
Фигонлар меники,
Бўзлар меники.
Қизил изтопарлар.
Ася укаларим.
Кунда изланг,
Ватан қаҳрамонларини.

Тиндирманг уларнинг
Қирғин йиллардан,
Қўлма-қўл сизларга
Узатган жонларини!
Айтсин,

Сизлар ёзган,
Езмаган хатлар.

Айтсин,

Қизил майдон
Мажнунтоллари;

Юртимдаги ҳамма
Номаълум Солдатлар —

Марҳаматли

Офтоб

кампир

боллари!..

САКСОНИНЧИ ЙИЛЛАР КОМСОМОЛЛАРИ

Фарғона канали. Фарҳод — тўғони,
Гулларга бурканди Мирза чўллари.
Дўнонлар чарчади. Сиз нима дейсиз,
Саксонинчи йиллар комсомоллари?

Ҳайкалга айланди кўз ўнгингизда,
Турсуной штурваль қучган қўллари.
Мамажонлар кетди. Сиз нима дейсиз,
Саксонинчи йиллар комсомоллари?

Ногоҳ бир ноҳақлик ўтса жонидан,
Абдуллани эслар Бойсун чоллари.
У тоғларда қолди. Сиз нима дейсиз,
Саксонинчи йиллар комсомоллари?

Анов ялвон гуллар қизғалдоқ эмас,
У қонга бўялган Майна холлари.
Мен қўшиқ ёзаман. Сиз нима дейсиз,
Саксонинчи йиллар комсомоллари?

Олдимдан чиқади қаерга борсам,
Мовий кўзли Краснодон боллари.
Кошевой гапирмас. Сиз нима дейсиз,
Саксонинчи йиллар комсомоллари?

Тунга сингиб кетди битта бақалоқ,
Қўйнида Бухоро қоракўллари.
Қизилқум тўлғонар. Сиз нима дейсиз,
Саксонинчи йиллар комсомоллари?..

Бизнинг даврон кулган. Бизнинг бахт кулган.
О, сўлим оқшомлар, ёр висоллари.
Мени бир ўй ёқар. Сиз нима дейсиз,
Саксонинчи йиллар комсомоллари?!..

* * *

Қилавермас ҳар кимга насиб
Трамвайда қофия ахтармоқ,
Сиёҳ қотиб қолган беш бармоқ.
Ҳар куни бир жондан тўймоқ,
Қоғоз билан ўз-ўзин сўймоқ...

Энг яқин дўстидан кечгандек,
Чириллатиб юракни гоҳ.
Чўнтакдаги охирги сўмни
Контролёр кафтига қўймоқ...
Қилавермас ҳар кимга насиб.

Бахтин излаб қайда кезмасин,
Қайга йўли тушмасин йироқ.
Осмонўпар уйлар ортидан,
Жим мўралаб турган ҳур қишлоқ —
Қилавермас ҳар кимга насиб...

Онажон, мен шоир бўламан,
Ва бу йўлдан қайтиш йўқ, энди.
Гоҳи юрак тўлиб кетса ҳам,
Тиг суякка бориб етса ҳам
Ҳеч кимга сир айтиш йўқ энди.

* * *

Жуда синчков, жуда анди нозиктаъб,
Менинг беш яшар ўғлим.
Чумчуққа хам термулади соатлаб
Менинг беш яшар ўғлим.

Сувни кўрса, тушиб сузаман дейди.
Гулни кўрса, қўйвор, узаман дейди.
Битта ўзим дунё кезаман, дейди —
Менинг беш яшар ўғлим.

Дунё эса... дунё кунда кулмайди,
Дунё беун, дунё парво қилмайди.
Бир бола-да, дер, назарга илмайди —
Менинг беш яшар ўғлим.

Менинг беш яшар ўғлим.
Ерга қараб юраги эзилмайди,
Кўкка қараб юраги сиқилмайди,
Ракеталар нималигин билмайди...
Менинг беш яшар ўғлим.

Азизимсан,
Бахтиёримсан,
Ишонганим — ваъфодоримсан,
Елғизимсан... Умринг ўлчовли
Қарға эса мингга киради.

Билиб юрар,
Кўриб туради,
Қузғун — ажал топар бехато.
Жондан ортиқ кўраман лекин
Сени боғлаб қўйган йўқ, ота...
Қарға эса мингга киради.

Юрак тоқай уриб туради?
Юрак тингай тўлса паймона.
Маъюс чехранг кўксимни ёқиб
Сен ҳам бир кун ўтарсан, она,
Қарға эса мингга киради.

Йиллар бизни ўриб туради,
Уйда, йўлда, шошиб-шошмасдан,
Хайрлашиб — хайрлашмасдан
Эриб, оқиб ўтаверамиз
Қарға эса мингга киради..

Сочгум гулдай дунёга меҳрим,
Токи юрак уриб туради.
Сен абадий яшайсан, шеърим,
Қарға фақат мингга киради.

* * *

Хиёбонда лола,
Тувакда лола,
Фонтанлар қиқирлаб кулаверади.
Менинг киндик қоним тўкилган дала
Сени эса кўргим келаверади.

Уйимга энгашиб кундузи булут,
Оқшом ой мақомлар қилаверади.
Тўпроқ йўл бўйига чўккан қари тут,
Сени эса кўргим келаверади.

Дунёнинг жаннати бу мовий шаҳар,
Кунларимни гулга белаверади.
Узумбарглар аро ёришган саҳар,
Сени эса кўргим келаверади.

Еришади осмон, йиғлайди осмон,
Замин зир айланиб елаверади.
Билмайман нимасан, билмайман кимсан,
Сени эса кўргим келаверади..

ИЛТИЖО

Кунлар ойга, ойлар йилга айланар,
Айланади чархи бешафқат,
Гули хас, гунчаси гулга айланар,
Жон ота, сен
Қарима фақат...

Ким қонибди неъматига бу ҳаёт?
Утган кунни қандай этиб бўлар рад.
Аммо бўлса бу дунёнинг гаштига
Қон, ота, сен
Қарима фақат!..

Ешинг фалон дерлар, кимда ганим йўқ,
Ганимсиэ ҳам хато ёзув, хато хат.
Ҳайқир ота: бунчага кирганим йўқ,
Тон, ота, сен
Қарима фақат...

Ким қонмаса неъматига бу ҳаёт
Утган кунни этса бўлар рад.
Юрганча юр, турганча тур чин
Осмон, ота, сен,
Қарима фақат!

БОР БУЛ...

Шерали Жураевга

Бор бул бағримда мудом,
Утли имоним менинг.
Қон бўлиб кетганда ҳам
Танамда бу жоним менинг.

Менга бу жаҳон надир,
Шухрат надиру шон надир.
Топмасам-топсам қадр
Булбулдир забоним менинг...

Аҳли ағёрлар яшанг,
Пашшадин филлар ясанг,
Сиз туфайли бўлмаса
Бўлмасин хуш оним менинг.

Эй юрак, эй сен юрак,
Менга сендек дўст керак.
Йўқ сендан бўлак
Бир меҳрибоним менинг...

Бор бул, эй тупроқ далам,
Сенга таъзим, сенга салом,
Сочлари оллоқ онам
Ўзбекистоним менинг.

ВАТАН

Сизга айтсам, ҳали тувроқ ботмай товонга
Ва муҳаббат қийноқларин билмасдан олдин,
Ажиб туғён келаверади бостириб қонга,
Мен бир ҳисга кўнгил бериб балога қолдим...

Мана энди армоним кўп кўринмайдиган,
Кўринса ҳам бировларга шунчаки эрмак.
Дала йўлда қуриб қолган ялпизнинг зори,
Шотутларнинг сувга тушган кўзёшларидек.

Сиз куларсиз, бу китобий сўзларни қўй, деб
Хитобларни тўкаверма, бола, липпадан.
Аммо рости, лабда болдек қотиб қолган шу
Онам сути, онам сути экан-да Ватан!

Шу ватанга нафим бўлса дейман менинг ҳам
Ва мақтанчоқ шоирчалар текканда жонга.
Уятларда ловуллаган юзимни босиб,
Овунаман мўмину соф Ўзбекистонга.

Давраларни ҳайрон этиб кетаман чиқиб,
Ярим тунда йўл оламан бий дала сари.
Юлдузлармас, қаранг, кўкда порлаган, улар —
Шу юрт учун қурбон бўлганларнинг кўзлари!..

* * *

Бу қиз эса тушунмайди, тушунмас мени,
Бу қиз менинг кўзларимдан излар тасалли.
Севаман деб сочим силаб, юзма-юз ёлғиз
Ва елкамга нигоҳ тираб ўйлайди: далли..

Билмайдики, ҳали тупроқ ботмай товонга,
Ҳали севги азобларин билмасдан олдин.
Келаверди бир дунё ҳис бостириб қонга,
Мен туйғуга кўнгил бериб балога қолдим.

Билмайдики, юрсам-турсам йўлдошим шу юрт
Уйқумда ҳам жонга босиб ётаман қўлин.
Қиз дегани Зулайҳодан сулув бўлса ҳам,
Севолмайди уни ҳеч ким, суймаса элин..

Мактабдошим бўлар эди Менинг сирдошим,
Кечалари кўкка боқиб ўйлар сурардик.
Қайда кибор кимса ё бир тубанлик
Қўлимиз мушт, тишимизни қайраб юрардик.

Уни бугун бешикдаги бола ҳам тапир,
Олим, дейди... ўзи маъқул, сўзлари маъқул
Сен бекорчи хаёлларни сувга соч, энди
Яшашни бил, дея менга хат ёзар нуқул.

Яшашни бил! Яилтиллайди кўзлари ёмон,
Яшашни бил! Кулар олпоқ кўйлак, оқбадан.
Севаман, деб қасам ичар талабасига,
Йигинларда нутқ сўзлар: она бу — Ватан!

Ҳовучимда бўтана сув ичмасман энди,
Хайр энди болалигим — бебаҳо тилсим.
Мактабдошим бўлар эди, энг яқин дўстим,
Уни бугун сенинг шаффоф руҳинг кўр қилсин..

Сиз куларсиз, бу хитобий гапларни қўй, деб
Аmmo рости, бир ҳикматни энди билдим мен:
Хей одамлар, лабда болдек бўлиб турган шу
Онам сути, онам сути экан-да Ватан!..

Шу ватанга нафим тегса дейман менинг ҳам,
Юрак ундан бир сўз кутиб бўйлар осмонга.
Уғлим, деса икки қўллаб жонимни тутиб
Сигинаман мўмин ва соф Узбекистонга.

* * *

Осмон чўкиб қолди бу оқшом,
Юлдуз бўлиб ёғилди бир сас.
Бир маҳалла нигоҳин кўрдим.
Яшаш керак, севиш шарт эмас.

Садоқатим?

Кимга керак у?..
Беҳудадир кўз ёшнинг сели.
Юлдуз бўлиб ёғилди бир сас,
У бегона. У энди келин..

Тўй — бу асли баджаҳл ота,
Бахтли бўлсин қизим дегани.
Уни сенга бермасман, бўтам,
Тирик экан кўзим дегани.

Осмон чўкиб қолди бу оқшом,
Қонимда бир ғашлик ўрмалар.
Мен оловга отарман энди,
Юрагимни қийма-қиймалаб...

Ёқа ушлаб қолсин кўрганлар,
Оловларга отгум, уни бас.
Ениб кетсин чирсиллаб қалбим,
Севиш керак... яшаш шарт эмас.

СЕВИШ ҚЕРАҚ... ЯШАШ ШАРТ ЭМАС!

ТУШИМГА КИР, ЖОНИМ

Капалакдай келиб,
Қошингга қўниб,
Кўзингга термулиб умрим ўтсайди..
Нима ҳам кўрибман мен йигит бўлиб?
Сочингни силашга қўлим етмайди.

Пешонам экан, пешонанг шудир,
Тушимга кир, жоним, тушларимга кир.

Товонинг ўпади ариқдаги сув,
Кўйлагинг этагин ўпади майса,
Мен-чи бир гиёҳча бўлолмадим-ку,
Эй, қадди сарв, эй киприги найза.

Пешонанг шу экан, пешонам шудир,
Тушимга кир, жоним, тушларимга кир.

Ўтиб бораётир бу умр — карвон,
Кунларнинг бўйида юрак қўнгироқ.
Мен сенга армонман, сен менга армон,
Кўнглимнинг тўрида тутар шамчироқ..

Пешонам шу экан, пешонанг шудир,
Тушимга кир, жоним, тушларимга кир.

Капалакдай келиб, қошингга қўниб,
Кўзингга термулиб умрим ўтсайди.
Қолдингу бағримда жонимдай бўлиб,
Юзингни силашга қўлим етмайди.

Пешонанг шу экан, пешонанг шудир,
Тушимга кир, жоним, тушларимга кир.

СЕВГИ, СЕНДАН ҚУРҚАМАН

Севги, менга бўйлама,
Меҳринг билан сийлама.
Оташ нигоҳинг қадаб
Жонимни ёқиб қийнама,
Қўрқаман.

Энг беғубор сен ўзинг,
Энг беозор сен ўзинг.
Лекин гоҳи йиғлатиб
Ошиққа озор сен ўзинг.
Қўрқаман.
Не бўлди мафтунларинг,
Кўйингда мажнунларинг.
Домингга тушган дилни
Қон қилди-ку афсунларинг,
Қўрқаман.

Сенмасму Лайлосидан,
Вомиқни Узросидан,
Айриб бўзлатиб кетган
Юсуфни Зулайҳосидан?..
Қўрқаман.

Севги, менга бўйлама,
Меҳринг билан сийлама.
Оташ нигоҳинг қадаб,
Жонимни ёқиб қийнама.
Қўрқаман.

ЮРАК

Юрак, ёмон экансан,
Қил-қизил қон экансан.
Кун йўқ экан менга ҳеч,
Сенки омон экансан..

Қиз суйдинг — бўлди армон,
Этакка тўлди армон.
Бўлди, сени кўксимдан
Юлиб утга отарман.

Дўст тутиндинг — ёв чиқди,
Елкамга найза суқди.
Сенинг билан сизиниб
Юрган йўлда ғов чиқди.

Ана, севгим — учган ўқ,
Муздек тошни қучган ўқ.
Қиз суйдинг — бўлди армон.
Кўриш бору айтиш йўқ.

Бўлди, сени кўксимдан
Юлиб сувга отарман.
Соҳилларда қум билан
Қучоғлашиб ётарман..

Юрак, ёмон экансан,
Қил-қизил қон экансан,
Кун йўқ экан менга ҳеч.
Сенки омон экансан..

КУМУШБИБИ ПОЛАСИ

Сизга бир армон бўлай, золим бегим,
Жайрон бўлай, қувлаб етиб олинг, бегим.
Марғилоннинг йўлига бошим қўйиб,
Жон берай, Зайнаб билан қолинг, бегим.

Қани ул қайрилмақош Кумуш, деманг,
Бағри гул, бағри оташ Кумуш, деманг,
Кўзларингиз нега ёш, Кумуш, деманг,
Бир курай, Зайнаб билан қолинг, бегим...

Сигмадим кундошнинг бу тош шаҳрига,
Дош беролмам бу қарошлар заҳрига,
Ёрдан айрилдим қаро ер бағрига
Жо бўлай, Зайнаб билан қолинг, бегим.

Сен нечун тўлғонасан куйган кўнгил,
Отабекни жонидан суйган кўнгил,
Яшнагаймиз бир қучоқда икки гул...
Мен сўлай, Зайнаб билан қолинг, бегим.

Ёртиннам рухсорига жоним фидо,
Бу жаҳонда борига жоним фидо.
Хайр, эй, ширин забоним, алвидо,
Мен ўлай, Зайнаб билан қолинг, бегим...

Сизга бир армон бўлай, золим бегим,
Жайрон бўлай, қувлаб етиб олинг, бегим,
Марғилоннинг йўлига бошим қўйиб,
Жон берай, Зайнаб билан қолинг, бегим.

ҚУШИҚ

Олмани отдим отганга..
Халқ қўшиғи

Ишонгандим дўстимга
Ишонгандай ўзимга.
Дўстим мени алдади,
Ханжар урди кўксимга.

Боғлардаги гул, япроқ,
Энди менга дўст, ўртоқ.
Гулхан бўлиб чарсиллаб,
Бағри дилим ёнар, воҳ.

Олмани отдим отганга,
Дийдаси тош қотганга.
Дунё бўлсин қоронғу,
Ўз дўстини сотганга..

Ишонгандим ёримга,
Суюкли дилдоримга.
Ёрим мени алдади,
Қулоқ солмай зоримга.

Тоғлардаги қизғалдоқ,
Энди менга ёр, ҳамроҳ.
Гулхан бўлиб ловуллаб,
Бағри дилим ёнар, воҳ.

Олмани отдим отганга,
Юраги тош қотганга.
Дунё бўлсин қоронғу,
Севгисини сотганга..

ЕР-ЕР

Осмон олис, осмон жим,
Мархамтда қор ёғар.
Сени қандай севардим,
Кўролмади қарғалар.

Ҳай-ҳай ўлан, жон ўлан,
Жоним қақшар, ёр-ёр.
Қайда бўлсанг сен билан
Севгим яшар, ёр-ёр...

Осмон олис, осмон жим,
Осмон қулоқ солади.
Юрагимни соғинчим
Гижжак қилиб чалади.

Ҳай-ҳай ўлан, жон ўлан,
Жоним қақшар, ёр-ёр.
Қайда бўлсанг сен билан
Севгим яшар, ёр-ёр...

Осмон олис, осмон жим,
Осмон юлдуз тўшайди.
Билагингда бармоғим
Изи борга ўхшайди.

Ҳай-ҳай ўлан, жон ўлан,
Жоним қақшар, ёр-ёр.
Қайда бўлсанг сен билан
Севгим яшар, ёр-ёр...

Бу бевафо дунёдан,
Бир кун мен ҳам ўтарман.
Юлдуз тўла самодан
Қўшнқ бўлиб қайтарман.

Ҳай-ҳай ўлан, жон ўлан,
Жоним қақшар, ёр-ёр.
Қайда бўлсанг сен билан
Севгим яшар, ёр-ёр!

МУҲАББАТ

Муҳаббатим, қайдасан қалб ардоғим,
Жайронкўзим, қирларда қолган оҳум.
Қўлим тегмай тўкилган қизғалдоғим —
Энди сени излаб қайдан топарман?..

Келар бўлсанг йўлингга гул тўшардим,
Сен Лайлига мен Мажнунга ўхшардим.
Бу дунёда ҳижрон йўқ деб яшардим —
Энди сени излаб қайдан топарман?

Ойни кўрмай юлдузга термулдим мен,
Севгим, сен қон йиғлаганда кулдим мен.
Ҳеч қиёсинг йўқ экан-ку билдим мен —
Энди сени излаб қайдан топарман?

Кўнглимни куйдириб бир йўли ҳижрон
Узра кетиб борар менсиз бир қарвон.
Умримнинг ярмини тўлдирган армон —
Энди сени излаб қайдан топарман?..

Муҳаббатим, қайдасан қалб ардоғим.
Жайрон кўзим, қирларда қолган оҳум,
Қўлим тегмай тўқилган қизғалдоғим,
Энди сени излаб қайдан топарман?

СОҒИНЧ

Ялпиз ҳиди келар кокилларидан,
Севгилим сеҳрли бир сўзга муштоқ.
Менинг кўз ўнгимда саратон, қишлоқ,
Қамишзор... қурбақа, булбул у ерда,
Отам кетмон чопар қоп-қора терда.

Токчада мўлтираб турар гулларим,
Хушомад етаклаб келган кунларим.
Қуёш ботар аста улар ортига,
Ўйлайман тутзорни оралаб бу дам
Ҳорғин уйга қайтиб келмоқда отам.

Ҳорғин уйга қайтиб келмоқда отам,
Кўзлари киртайган, соқоли ўсган.
Севгилим кўнглидан кечганин сезиб,
Кулар лабга босиб бармоқларини,
Кокили йўлимни тўсгани-тўсган.

Инсонни қаритар кўрган тушлари,
Соғинчдан ўлади одам ўлганда.
Дунёнинг энг шодон йиғити бўлиб,
Яшардим бу улкан шаҳарда балки
Ёнимда бесавод отам бўлганда...
Мени еру кўкка ишонмас бу қиз,
Гуноҳим жуда кўл гарчи, биллади.
Жим тинглайверар-у ёлғонларимни,
Отамни соғиндим десам, кулади.

* * *

Узун кеча ўзингни уйлаб,
Дардларимни елларга сўйлаб,
Тушларимни қишининг қорига.
Тонгни кутаяпман сокин, жим,
Тонгни кутаяпман, севгилим,
Қиё боқмай ой рухсорига..

Сенсиз ўтган умримдай маҳзун,
Сенсиз ўтган умримдай узун,
Ушбу совуқ тун ҳам зим-зиё,
Тонгни кутаяпман сокин, жим.
Тонгни кутаяпман, севгилим,
Юлдузларга қайрилмай қиё...

...Юракни қон қилди бу кеча,
Тонгга, қанча қолди тонггача?
Э воҳ, сўнгги бардошим сўнди,
Қандай яшай, севгилим, сенсиз?
Қандай яшай, етар-э, юлдуз,
Ой бўлса ҳам ботсин-да, анди...

Кунлар ботар сендан дарак йўқ.
 Тонглар отар сендан дарак йўқ.
 Осмон тўла юлдуз соғинчим,
 Юрагимда ловуллаган чўғ.
 Ёғилади кўклардан зори:
 Сен кутган қиз бировнинг ёри...

Андижонда бодом гуллаган,
 Боғишамол лол — ким йиғлаган?
 Боролмайман у ёқларга ман,
 Борсам кулар билган, билмаган.
 Кўллар қири, боғи — баҳори:
 Сен кутган қиз бировнинг ёри.

Бу дунёда ким бор суймаган.
 Суйиб соғинмаган, қуймаган.
 Севгим — осмон тўла соғинчим
 Мени қийнагани-қийнаган.
 Кўнглимда ишқ, қўлимда тори:
 Сен кутган қиз бировнинг ёри..

Қизғалдоққа кўмилган диёр,
 Эй яшнаган, эй кулган диёр.
 Иқболимга ёғдулар сочиб,
 Кўзларимга термулган диёр —
 Юртим, ўзинг кўнглим баҳори,
 Мен айтган қиз, бировнинг ёри.

ТУҒРУҚХОНАДА

Мана қандай экан оталик бахти:
Турибман гулларим билан панада.
Бир маҳалла бўлғуси файласуфлар,
Олимлар чинқирар туғруқхонада...

Апрель, айланайин ялпизларингдан,
Айланайин осмон кўзлари зангор.
Дунё бугун менга туюлди бирдан,
Чақалоқлардан ҳам мўмин, беозор.

Ҳамшира имлайди: келинг яқинроқ,
Ана у, ўғилми — қизми билмайман...
Ойнадан термулиб сочингни силайман,
Юзингдан ўпаман докадек олпоқ.

Кейин жим кетаман исмлар излаб,
Тақдирингни ўйлаб йўқдир оромим.
Майли ўғилмисан-қизми бари бир,
Юлдузинг ёруғми менинг давомим?..

Тонгим кулгу эди,
Шомим хавотир.
Дунёда нима гап дея бўйлайман.
Атомлар асрида кунбўйи шод юрмоқ —
Жуда катта бир бахтлигин ўйлайман...

Яна сен ёдимнинг ойинасида,
Кўлингда боламиз — Мўмин Чақалоқ.
Олам тинч. Хўрсиниб сочингни силайман,
Юзингдан ўпаман пахтадек олпоқ.

МАЖНУННИ УЙҒОТСАММИКИН?

Янги-янги тонг бўлиб отсаммикин.
Кун бўлиб уфқ пойига ботсаммикин?
Бевафо ёримга жонимни бериб,
Ойга бошимни қўйиб ётсаммикин?

Мен ёнарман беқиёс меҳрим билан,
Дил куяди дардлашай деб ким билан,
Ёрни ҳеч парвоси йўқ кўнглим билан,
Қон юракни сизга кўрсатсаммикин?

Мулки ишқ кўзлардами вулқон эмас,
Минг яшир пинҳон эмас, пинҳон эмас.
Сезмас у шоҳу-гадо инсон эмас.
Қўлда рубоб, йўлда тош қотсаммикин?

Билмади қадримни дилдор, билмади.
Кулмади, ҳеч менга омад кулмади.
Мени бу аҳли фозил тушунмади,
Оҳ уриб Мажнунни уйғотсаммикин?..

Янги-янги тонг бўлиб отсаммикин,
Кун бўлиб уфқ бағрига ботсаммикин?
Эй, Муҳаммад, ёрга жонимни бериб
Ойга бошимни қўйиб ётсаммикин?

* * *

Уруш йилларининг жонон қизлари,
Мункиллаб қолишди ҳаммаси қариб.
Шарқ қайси томон деб уларни сўранг,
Улардан сўранглар, қайда деб Фарб..

Кун чиқар, кун ботар, юлдузлар ёнар,
Хат кутиб бир ўлка ҳур қизлар ёнар.
Кўзлари чўлпонлар, юзлари анор
Дунёда энг сулув бир қизлар ёнар.

Қаранг, қор тагида қолмасин кўсак,
Енгамиз чидасак, енгамиз чидасак.
Уруш йилларининг жонон қизлари —
Йўллари яхмалак, қўллари кесак!..

Ялангоёқ даштда бошоқлар терган,
Зебу сепин йиғиб фронтга берган,
Уруш йилларининг жонон қизлари —
Йигит кўрган ҳамма балони кўрган.

Брестда тик турган,
Волгада тик турган,
Дзотлар домига ўзини урган,
Масковни бермаган солдатни кутиб юрган
Уруш йилларининг жонон қизлари,
Мункиллаб қолишди ҳаммаси қариб..

Мункиллаб қолишди ҳаммаси қариб,
Аммо топгай тағин ким шундай қадр —
Садоқат нима деб улардан сўранг,
Улардан сўранглар Виждон нимадир!

СОҒИНЧ САТРАРИ

Синглим менинг,
Рангпаргина синглим менинг,
Сени кутар тор уйингда тўққиз бола,
Кенг уйингда поёни йўқ дашту дала,
Сен кўникдинг.
Кўникмас ҳеч кўнглим менинг...

О, ёнимда бир нозанин шод кулади,
Унга ҳамма ёзганларим ёд, кулади.
Парвонадек жонимдан минг ўрғилади,
Сени ўйлаб бағрим тилим-тилим менинг.

Шодон шаҳар саҳаргача ялла айтар,
Олисларда қирда тўзон — пода қайтар.
Елинлари сутга тўлган бизнинг жайдар
Сигиримиз чиқмас кесиб йўлим менинг.

Бу ерларда билишмайди бия нима,
Адир нима, анғиз нима, қия нима.
Акам шоир бўлиб мендан кечди дема,
Қўшиқ айтсам бир елкангда қўлим менинг.

Қўёш чиқар, қўёш ботар, соғинаман,
Кўкрагимда бир тош ётар, соғинаман.
Токай чидай бу жудолик доғина ман,
Қани ўша қозикдаги тўним менинг!.

Синглим менинг,
Хўшрўйгина синглим менинг,
Сени кутар тор уйингда тўққиз бола,
Кенг уйингда поёни йўқ дашту дала,
Сен кўникдинг,
Кўникмади кўнглим менинг.

* * *

Бир куни
Ёнингга келаман,
Дейман: мен сен кутган боламан.
Тингдайсан очилиб сен чаман,
Мен сени севаман, севаман!..

Кел дейсан кун совуқ, ўтиргил
Кафтимда лайлакқор — атиргул.
Хонангда югуриб-еламан,
Мен сени севаман, севаман.

Ким у жим кулади, кулади
Билдирмай эрмаклар қилади.
Майли мен ғалати, телбаман,
Мен сени севаман, севаман.

Кел, дейсан. О, мунча кечикдинг,
Йўқ энди у ғунча, кечикдинг.
Боқ йигит, атрофинг қаҳратон...
Мен сени севаман, севаман.

Сен турган жой энди бий дала,
Қўлингда қоракўз бир бола.
Мен энди қўшиқмас — ноламан,
Мен сени севаман, севаман.

Айт, мендан не истар бу одам.
Тиқилар синарми иродам?..
Тиқилар бир ёмон, бир ёмон,
Мен сени севаман, севаман!..

Мени ёв этмиш бор мардум-ла.
Лабимдан учмаган бир жумла.
Энди кеч, энди не қиламан,
Мен сени севаман, севаман!..

БОҒДА

Тиллақўнғизни суя оқизиб кетди,
Биз ўй сурдик қўлни иякка тираб.
Улгунча биргамиз.. қасамлар ичдик,
Кетаверди қўнғиз шўрлик мўлтираб.

Ким ариқ бўйига атиргул экди,
Сувга гулбаргини тўкиб кетди ким,
Тиллақўнғизни суя оқизиб кетди,
Жуда раҳмдилман, севгилим...

Сени қандай суйиб, эркалай энди,
Қайси гулшанларга етаклай энди?..
Энди сен севаман десанг ҳар сафар,
Кўксимда ҳалиги қўнғиз ўрмалар.

* * *

Мен бир дедим,
 бир дедим,
Узгинам дилгир дедим.
Бугун менинг ёнимда
Йўқ энди кимдир, дедим...

Биров деди, жим бўл, жим,
Биров, қўйсанг, қўй дўстим.
Биров эса, ким у, ким?
Айтолмайман, сир дедим...

Биров менга кут, деди,
Биров қўй, йигит, деди,
Бировлар унут, деди,
Мен эса тақдир, дедим.

* * *

Ситамларинг кўпдир менга,
Ситамларинг, эй гулгун.
Кел, юзингдан ўптир менга,
Унг юзингдан ўптиргин.

Қачон борсам кел, деб турма,
Заҳринг сочиб ўтиргин.
Галирмагин,
Гапиртирма,
Сўнг... юзингдан ўптиргин.

Суймасанг суйкалиб нетай,
Бу дунёдан нолиб нетай,
Майли ўтай,
Майли кетай,
Кел, кўзингдан ўптиргин...

ҚИЗИЛ ОЛМА

Набижонга

Баланд шохда қизил олма
Пишган экан,
Узиб олиб қарасам қурт
Тушган экан.

Мен олмани ирғитворсам,
У дод солди:
Ташлаб кетар экан мени
Нега олди?!

Қизил олма, қизил олма,
Мен енгилдим.
Дунёи дун деганларин
Энди билдим...

Юрагим-ей, сени не ўй
Ўртамоқда,
Севгига йўл бўлсин бизга
Бу чорбоқда.

Баланд шохда қизил олма
Пишган экан...
Бизнинг бошга шундай савдо
Тушган экан.

ХУЛОСА

*Муҳаммадни шоир деманг, Муҳаммадни
У қадрига етмиди илк муҳаббатнинг,*

*У такаллуф қилмади қиз болаги ҳам,
На севгини билмади, на садоқатни.*

*У бир кибор — булутлардан сурар бўса,
Айтсин ана, юлдузларнинг тили бўлса.*

*Кулгу чақнар юрагин бир ерларида,
Узи йиғлаб турганда ҳам шеърларида...*

*Муҳаммадга ишонманглар, Муҳаммадга,
У чин фарзанд бўлолмади Марҳаматга.*

*У йилда бир йиқлаб бормас онасини,
Сувоқлари кўчиб кетган хонасини.*

*Темир шаҳар бойлаб қўйган кўзларини,
Соғинмайди на уйин, на дўстларини.*

*Тополмайсиз изларини кенг даладан,
Узимнинг ҳам кўнглим қолди бу боладан...*

МУНДАРИЖА

Бир куни	3
--------------------	---

Қўшиғимсан, Ватаним

Уруш бўлмасин	4
Бригадир	5
Ёқуб мерган	7
«Сизни ҳеч ким танмайди»	8
«Бу эшик...»	9
Бобом билан суҳбат	10
«Оламда нима гап»	11
«Тушимга киради Қодирий Бобом»	12
«Ёлгон ёмон дерлар»	13
Туғилган кунда	14
Ўгурур	15
Метин иродалар	16
«Мен кузни соғиндим»	18
Шукур Бурҳон	3
Марҳамат	20
Математикани ёмон кўраман	21
Уч оғайни ботирлар	22
Қизил изтопарлар	25
Саксонинчи йиллар комсомоллари	28
«Қилавермас ҳар кимга nasib»	29
«Жуда синчков»	30
«Азизимсан, бахтиёримсан»	31
«Хиёбонда лола»	32
Илтижо	33
Бор бўл	34

Ватап35
Бу қиз эса тушунмайди36
Сиз куларсиз37
«Осмон чўкиб қолди»38

Севиш керак яшаш шарт эмас

Тушимга кир, жоним	39
Севги, сендан қўрқаман.	40
Юрак	41
Қумушбиби ноласи	42
Қўшиқ	43
Ер-ёр	44
Муҳаббат	46
Соғинч	47
«Узун кеча»	48
«Қуқлар ботар»	49
Туғруқхонада	50
Мажнунни уйғотсаммикин	51
«Уруш йилларининг»	52
Соғинч сатрлари	53
«Бир куни епингга келаман»	54
Боғда	55
«Мен бир дедим ...»	56
«Ситамларинг кўлдир»	57
Қизил олма	58
Хулоса	59

Юсуф Муҳаммад.
1—091 „Илтижо“. Шеърлар.— Т. „Ёш
гвардия“, 1989.—64 б.

Бу тўпلامдан ўрин олган катта-ю кичикка баб-баробар тушунарли шеърлар, китобхон қалбидан она ерга муҳаббат ва ифтихор туйғуларини парваришлайди.

Тўпلامдаги бир қатор шеърлар қишлоқ ва унинг меҳнаткаш одамларига бағишланган. Шoir мавзу моҳиятини чуқур ҳис эгган ҳолда ҳар ҳолатда ҳодисани завқ-шавқ билан ҳикоя қилади. Шoirнинг итиди оддий, шунинг билан бирга ўзига хос жилоти.

Юсуф М. „Мольба“. Стихи.

Литературно-художественное издание

На узбекском языке

МУХАММАД ЮСУФ

МОЛЬБА

Стихи

Ташкент, издательство „Ёш гвардия“, 1989

Тақризчи — Тоҳир Қаҳқор

Редактор Я. Тоғаев

Рисом Б. Джалалов

Расмлар редактори Ҳ. Раҳматуллаев

Техн редактор В. Демченко

Корректор М. Набиева

ИБ № 2409

Теришга берилди 6.07.88. Босишга рухсат этилди 13.04.88. Формати 70×90^{1/32}. № 1 босма қозоғига литературная гарнитурда юқори босма усулида босилди. Босма листи 2,0. Шартли босма листи 2,34. Шартли кр. огт. 2,63. Нашр листи 1,47. Тиражи 10000. Буюртма 5120. Шартнома 169—87. Баҳоси 20 т.

Ўзбекистон ЛКСМ Марказий Комитети „Ёш гвардия“ нашриёти. Тошкент—700113, м Чилонзор, 8-квартал, „Правда“ газетаси кўчаси, 60.

Область газеталарининг М. В. Морозов номидаги бирлашган нашриёти ва босмахонаси. Самарқанд ш. У. Турсунов кўчаси, 82 1989.

Объединенное издательство и типография имени М. В. Морозова Самарқанд, ул. У. Турсунова, 82 1989.